

# Ina «miss earth» cun ragischs da Luven

Bellas dunnas s'engaschan per bunas chaussas

■ (anr/vi) **Sa sche la bellezza da Stefanie Gossweiler è ina ierta da Luven? Ella è la «miss earth» da la Svizra. A la concorrenza mundiala per la «miss earth» a Manila ha ella conquistà il 6avel plaz.** Gossweiler è creschida si a Bachs (ZH). Sia mamma è ina Pfister da Luven. Stefanie è stada sco mattatscha savens en vacanzas en Surselva, saja quai per ir cun skis, per gidar a far fain u far saivs. Las sairas gieva ella cun il tat en uigl. «Durant ch'el mulscheva hai jau raquintà sgnoccas», sa regorda Gossweiler. Il tat aveva adina plaschair da la legra cumpagnia.

Sin la dumonda, sche sia bellezza saja ina ierta da vart da la mamma, u plitost dal bab, respunda la «miss earth» a moda diplomatica: «Probabel èsi ina

maschaida. Tar mai na pon ins betg dir, tgi ch'jau sumegl il pli fitg.»

## Tge è ina «miss earth»?

Concurrenzas per il titel da «miss earth» datti dapi dus onns en Svizra. 112 pajais fan part da l'organisaziun. Ina «miss earth» è ina «miss» plitost alternativa. Ella na sa fatschenta betg mo cun l'atgna bellezza, mabain emprova da far insatge bun sin il champ sozial u ecologic. Il motto è «beauties for a cause». Quai munta pli u main: Bellas dunnas s'engaschan per ina buna chaussa.

La finamira d'ina «miss earth» n'è betg da raschlar uschè blers daners sco pussaivel en ses onn d'uffizi, mabain da procurar cun differentas accziuns ch'i vegnia pajà en daners per organisaziuns ca-

ritativas. Gossweiler lavura cunzunt a favur da «Terre des hommes» e «Caritas».

## Bun plaz a Manila

Ella gida era tar accziuns sco per il «Di mundial cunter Sida», fa referats en scola u emprova da recaltgar daners cun la vendita d'in calender per il 2008.

L'organisaziun svizra da «miss earth» elegia mintg'onn anc trais autras «missas»: Ina miss air, ina miss water ed ina miss fire. Quai è ina entira influaziun da missas. Ma sulet la «miss earth» repschenta mintgamai la Svizra a la concorrenza mundiala da l'organisaziun. Quella ha gi lieu ils 11 da november 2007 a Manila. Gossweiler ha cuntanschi il 6avel plaz da 90 candidatas ord l'entir mund.

Las finalistas per la proxima elecziun da la «miss earth» en Svizra èn dal reminent era gia elegidas. Tranter ellas sa chatta ina Grischuna, numnadamain *Marina Pedrett* da Sils en Tumblestga. L'elecziun ha lieu ils 6 d'avrigl a Berna.

## Pertge sa participar?

Atgnamain avess Gossweiler cumenzà l'atun passà cun il studi da medischina. Ma perquai ch'ella è vegnida elegida sco «miss earth» cumenza ella pir l'atun proxim.

E co è ella insumma vegnida sin l'idea da sa participar a questa concorrenza? «Mes bab ha vesi en la televisiun insatge sur da quai. Jau hai guardà suenter en l'internet e ma sun annunziada. Differents collegas m'avevan gia intima da prender part dad ina concorrenza da bellezza. I m'ha plashì ch'ins po cumbinar la concorrenza da bellezza cun ina buna chaussa.»

**Stefanie Gossweiler (20 onns) è sco matta gugent ida cun il tat da Luven en uigl. Oz na dess ins betg quai ad ella.**

MAD

[www.missearthschweiz.ch](http://www.missearthschweiz.ch)

